


Feria di Juliana School dedica na nos idioma Papiamentu

Minister Michelle Hooyboer-Winklaar contando storia

Como boluntario di Fundacion Bon Nochi Drumi Dushi



ORANJESTAD (AAN): Recientemente Juliana School a tene un tremendo feria di idioma Papiamentu, relaciona cu Aña di Papiamentu. Tur aña Juliana School ta conoci pa tene nan ferianan y Aureen Croes, docente di Papiamentu, a dicidi pa dedica e feria aki na nos dushi idioma. Un total di 18 grupo di C.B. 2 a presenta nan topico na manera creativo y unico. E meta di e Feria Festival di Idioma Papiamentu, tabata pa conscientisa e alumnonan como tambe tur presente, riba e balor di nos Papiamentu den nos comunidad.

Minister di Asuntonan Economico, Asuntonan Social

y Cultura, Minister Michelle Hooyboer-Winklaar, tambe tabata presente y a forma parti di e presentacion di Fundacion Bon Nochi Drumi Dushi. E tent aki a capta hopi atencion, mirando cu e mandatario mes tabata presente pa conta algun storia na e muchanan, hunto cu e 5 alumnonan cu a percura pa hinca tur cos den otro pa exposicion di nan tent di Bon Nochi Drumi Dushi.

Anwar Henriquez, estudiante di Juliana School klas 2B, a duna un splicacion corto tocante di nan proyecto di Papiamentu. "Nos a traha pa casi 8 siman, preparando tur cos pa e dia aki. Nos mes no tabata consciente di loke

e fundacion aki ta haci, pero awo nos ta balora y admira masha hopi mes, con diferente persona boluntariamente ta bishita cas y conta storia na Papiamentu pa nos muchanan, dunando balor y aprecio na nos idioma."

"Mi ta hopi contento pa mira un entusiasmo asina grandi cerca nos hobennan pa nan idioma. Varios mucha a bin bishita e tent di Bon Nochi Drumi Dushi pa tende storia. Nan ta scucha cu hopi interes y esaki ta comproba un biaha mas, cu lesamento pa nos muchanan ta importante y relevante pa nan adkision di idioma en general. Mi ta encurasha tur mayor pa nan

tuma maske ta 10 minuut di nantempopales y conta storia pa nan yiunan, ya cu e ta haci un diferencia hopi grandi riba desaroyo di nos muchanan. E fundacion Bon Nochi Drumi Dushi ta cosechando su exito den nos comunidad y nan meta principal ta hayando hopi atencion. Nos mester di hopi mas boluntario pa sigui aumenta e conscientisacion

den nos comunidad. E ta un trabou boluntario hopi satisfactorio, specialmente ora bo drenta den casnan di nos hendenan, cu ta ricibi bo cu hopi alegria y hospitalidad. E feria aki ta un exito rotundo, ya cu e atencion pa nos dushi idioma a haya tur acogida cerca e alumnonan di Juliana School", e mandatario a expresa.